

Mattup ere ki poone Zaŋ yi riije

En urzi k'ono don kun t'oone adda mattup ettiyo

Ette «Mattup ere ki poone Zaŋ yi riije». Zaŋ yi riije mattupiyagi paat: «Rabila Majjaanawa k'Isa Zaŋ yi riije», «Apokalipse» wo mattupiyagi don ado a biza tuddan. Ti diine kane don ado gen, ette mattupadi ere ki poone.

Ti kaaga gen, i d'ede don ongo an di lohito ono, an d'eesiyo, Isa Almasi yon an y'ehe aa wedusu gen, yon Ulo Raa ye. Wo an di rootiyo son, wede tuuku ton y'aase munda aa addi i dehu wo Raa yi ki y' wolle yon aa wede k'oldiko ye. Kono kamo Zaŋ y'an di riije a don i ziipe addan a Isa, an di suune kereŋ Isa miŋ yon wee wee, wo y'an di ruute son, ki kotto lekkiyo ere ki daayum tod'te ede, wo y'an di gize mummino kee wede k'a ti t'oone me. Wede tuuku yi ziipe addi a Isa gen, lekkiyo gette y'a ti t'oone. Wo a duwo y'an di ruute sey, ti Raa wo ti Ulí Isa an aa ti ketto kan soo, wo Raa an di y' geyye ti don pay i ziipe addan a Isa. An iza inkinno man, ki kotto an di suuna adda k'addan an t'oona lekkiyo ere ki daayum.

Wede an yi waaku Ono yi d'eliyo lekkiyo

¹ Kun ollo mattup ere ay un raaniya ette a tukki wede an yi waaku Ono yi d'eliyo lekkiyo, yon gen wede t'ume k'eesiyo suldi pay yon ede to. Yode gen ay y'illiga ti kuudey, ay di y' wulle, ay yi wulle t'edayey noo, wo beezey ton y'a yi butte.

² Aame wede i d'eliyo lekkiyo y'iido y'a gize tuddi gen, kaye ay di y' wulle. Kono kamo ay un di kazita rabiladi, rabila ki yode wede i d'eliyo lekkiyo ere ki daayum, yon yi likke a sirpa Meega Raa, anken Raa y'in ti y' gize.

³ Munda wede ay wulle wo ay illiga ti kuudey gen, a kune ton ay un ti y' kaza, kono kune ti kaye in lekkiyo kettiyo kan soo. Wo lekkiyadin kettiyo kan soo gette, tod'te ti Meega Raa wo ti Ulí Isa Almasi.

⁴ Gen kaye ay un raaniya inkinno, kono kine pay addin a ôona t'unsowo.

Raa yon toore

⁵ Raa gen yon toore, munda zimolo di yode umbo. Enno ono don ay illiga ti bize k'Isa Almasi me, wo ay un ti'n kaza.

⁶ Aame kine in'de in lekkiyo kettiyo kan soo ti Raa wo in sooru adda zimolo man, gen kine don lohito k'ono, in ki sooru a urzi wede derec ye.

⁷ Wo de aame in sooru adda toore aakede yode batum adda toore gen, in di lekka pay kettiyo kan soo, wo puuzo k'Ulí Isa t'in di'n isa kamilen t'oldikadin pay te.

⁸ Aame kine in'de oldiko in k'isiyo ye man, gen in daggiya tuddin, munda derec di kine umbo.

⁹ Wo aame kine in t'oodibe addin a oldikadin man, yode Raa ton y'in t'isa tambobino a

oldfikadiŋ te, kono yoŋ wede ki diine, yi seedu zakidi a munda wede yi ruute y'aasa: in kino maŋ y'in t'isa tambobino a oldfikadiŋ, wo y'in di'n isa kamileŋ ti suldi doŋ pay ulpi*.

¹⁰ Aame kine in'de oldfiko batum in k'ize ye maŋ, geŋ Raa in ti y'ize wede lohito k'ono, geŋ onamí adda k'addiŋ umbo.

2

¹ Inni ki nuŋ, n'un raaniya in kino kono ni dehu kun ki d'ise oldfiko ye. Wo de aame wede yi t'iire adda k'oldfiko maŋ, kun suuno wede noogiyadiŋ ede a daana Meega Raa me, yoŋ Isa Almasi wede ki diine.

² Yode batum y'ele tuddí sedefe, y'a inda ki booyiso k'oldfikadiŋ, wo kono k'oldfikadiŋ daŋŋal ye, k'oldfiko ki doŋ duniya pay*.

Geyyiso tudde a urzi Raa

³ Aame kine in seedu urziyagi k'oogoro Raa maŋ, t'urzi geŋ in di suune yoŋ in yi suune.

⁴ Wede y'ede Raa yi y' suune wo yi ki seedu urziyagi k'oogiradi ye maŋ, yoŋ geŋ wede lohito k'ono, ono doŋ derec di yode umbo.

⁵ Wo wede y'a seedu ono Raa maŋ, yoŋ geŋ ki kotto yi giyye Raa t'addi pay. T'urzi seedu k'onamí geŋ i-kaza in yi suune, kine in lekkiyo kettiyo kaŋ soo ti yode.

⁶ Aame wede y'ede yoŋ yi lekkiyo kettiyo ti Raa maŋ, i dehu y'a ozire aa Isa Almasi y'izire kay.

* **1:9 1.9** Kun wollo adda mattup ki Soom 32.1-5. * **2:2 2.2** Kun wollo adda mattup ki Romeŋ 3.25-26.

⁷ Zemba ki nuñ kune don ki geyyiso, ono don n'un raaniya en kane urzi k'oogoro aware ye, wo de kane urzi k'oogoro ere ti kaaga kun illiga t'ume k'eesiyo†. Urzi k'oogoro ti kaaga en kane ono don kun illiga.

⁸ Wo anken ono don n'un raaniya en kane urzi k'oogoro aware. Naabo k'Isa Almasi y'ize wo ti sooru ere ki kune gette, i-kaza urzi k'oogoro gen derec, kono naabo ere oldo a zimolo gette t'enjilso, wo iina ette naabo ere ki diine a toore kereñ baa.

⁹ Wede y'ede yon adda toore wo y'olmife leemadi man, yon gen yi lekkiyo daayum adda zimolo.

¹⁰ Wede yi geyyiso leemadi gen yi lekkiyo daayum adda toore, munda umbo yi ti y'oore leemadi adda k'oldiko me.

¹¹ Wo de wede y'olmife leemadi man, yode gen yi lekkiyo adda zimolo, y'ambe k'ume tunda'ñ yi ki suune ye, kono zimolo ti t'ippe a edayi.

Duniya kun ti geyye ye

¹² Inni ki nuñ, n'un raaniya kono oldikagun Raa y'un t'ize tambobino t'urzi suma ki yode Isa.

¹³ Kune maawi no, n'un raaniya kono kun yi zuune wede yo ede to t'ume k'eesiyo suldi pay me. Obilagi no, n'un raaniya kono Mohita k'oldiko kun ti jiiire.

¹⁴ Inni ki nuñ, n'un raaniya kono Meega Raa kun yi zuune. Kune maawi no, n'un riije kono kun yi zuune wede yo ede to t'ume k'eesiyo suldi

† 2:7 2.7 Kun wollo adda mattup ki Zan 13.34.

pay me. Obilagi no, n'un riije kono kune un d'ede toogo, wo ono Raa kun'ni ziida zakidfi, Mohita k'oldfiko toj kun ti jiiere.

¹⁵ Kune duniya kun ti geyye ye ti suldfutu pay. Aame wede yi geyyiso duniya man, gej geyyiso Meega Raa adda k'addi umbo.

¹⁶ Kun ollo enno suldi fon adda duniya me: suldi fon ulpi tudde ti dehu, suldi fon ersa ti zaapu wo koliyo tudde ti maala. Kane gej i k'ettiyo ti Meega Raa ye, kane'j suldi duniya.

¹⁷ Kun suune duniya ti suldfutu fuwo an zaapu addan eego gej, an t'engila, wo de wede y'a ziida zakidfi a naabo ere Raa yi dehu man, y'a lekka ki daayum.

Kun koono mentikagi ti fon k'olmide k'Isa

¹⁸ Inni ki nuj, onniyo k'ita t'iina aa kun d'illiga, a onniyo k'ita Wede k'olmide k'Almasi y'a etto, ankenno fon k'olmide k'Almasi kane ede baadan an t'udfo. Gej i-kaza onniyo k'ita t'iina‡.

¹⁹ Kane gej an udfde ti diine kine fon i ziipe addin a Isa, wo de ti poone to kane pay min ki kine ye. Derec, anki kane ki kine kotto man, an di lekke ti kine. Wo anken an t'udfde ti diinayin min, a t'iidiba ita kane pay ki kine ye.

²⁰ Wo kune'j, kun d'uune Unde Raa, tod'te Almasi wede kamilen y'un ele, injkino man kune pay derec kun ti suune.

‡ **2:18 2.18** Kun wollo adda mattup ki Matiye 24.5,23-24 wo Markus 13.21-22.

21 Nun n'un riije kono derec kun ki ti zuune ye ye. Aha, n'un riije kono derec kun ti zuune, wo kun zuune derec i-k'ede lohito k'ono ye.

22 Wede lohito k'ono minj yonj wee wee? Yonj minj wede i-tuuge yi rootiyo Isa yonj Almasi Raa yi biire ye. Wede k'olmide k'Almasi geŋ yonj yi-tuuge yi rootiyo Raa yonj meek'Almasi ye wo Almasi Ulo Raa ye.

23 Wede yi-tuuge yi rootiyo Almasi Ulo Raa ye maŋ, yode geŋ Meega Raa toŋ yi ki y' zuune ye. Wo wede y'umbe a Ulo Raa maŋ, geŋ yonj yi zuune Meega Raa pâyŋ.

24 Wo kune'ŋ kun aa soodo zakidfi a ono doŋ kun illiga t'ume k'eesiyo. Aame ono doŋ kun illiga t'ume k'eesiyo kun'ni ziida zakidfi adda k'addugun maŋ, kune toŋ kun di lekka kettiyo ti Ulo wo ti Meega.

25 Enno munda wede Isa yi ruute y'in t'ela me: lekkiyo ere ki daayum.

26 Nun n'un riije inkiŋo kono kun di koone mentikagi ti doŋ an dehu an un ti'n dagge.

27 Wo kune'ŋ, Almasi y'un ele Unde Kamilen, wo tod' ti lekkiyo kettiyo ti kune. Geŋ i ki dehu wede dooyiso ti doolo y'un gi di'n dooye ye baa. Tode Unde Kamilen gettiŋ t'un di'n dooye a suldi doŋ pay derec, munda ki lohito k'ono umbo. Inkiŋo maŋ kun lekko daayum kettiyo t'Almasi aakede Unde Kamilen t'unni duuye.

28 Wo ankeŋ inni ki nun, kun lekko daayum kettiyo t'Isa Almasi. Inkiŋo onniyo ere y'aana yi-kiza tuddi a duwo pay gette, y'in di'n t'oona

ŋ 2:23 2.23 Kun wollo adda mattup ki Matiye 11.27 wo Zanj 5.23; 15.23.

daa niiku adda k'addiñ, in ki seeda sukiyagi ye a dfaanadí me.

Inñi Raa

²⁹ Kun suune Almasi yoñ ki diine geñ, kun suune kay wede tuuku y'isiyo naabo ere ki diine mañ, yoñ geñ ulo Raa.

3

¹ Kun ki wollo do Meega Raa y'in di'n giyye baadañ, y'in di'n waaku kine inñizi*, wo geñ ki kotto kine inñi Raa! Wo de kane doñ duniya an in ki'n suune ye kine inñi Raa me, kono kane Raa an ki y' suune ye.

² Zamba ki nuñ kune doñ ki geyyiso, anken kine in t'ize inñi Raa, wo de munda wede kine in t'isa a daana Raa y'in ki t'iidiba ita ye botto. Wo in suune aame Isa Almasi y'iina mañ, kine in t'isa aa yode, kono in di y' wolla kereñ eda ti eda.

³ Wede tuuku yi zaapu elkiso ere inkinno a Almasi mañ, y'a t'ise kamilen, aa yode batum kamilen.

⁴ Wede tuuku y'isiyo oldfiko geñ, y'a ti doopide a oogoro Raa. Derec, isiyo k'oldfiko gette, tod'te doopide a oogoro Raa.

⁵ Wo de kun suune Isa Almasi y'iido k'adda duniya y'a buuye oldfikadiñ, yode wede i-k'ede oldfiko ye.

⁶ Wede tuuku yi lekkiyo kettiyo ti yode mañ, y'a ki lekke adda k'oldfiko ye, wo wede tuuku

* **3:1 3.1** Kun wollo adda mattup ki Zanj 1.12.

y'isiyo oldfiko maɗ, geɗ Isa yi ki y' wolle ye, wo yi ki y' suune ye.

⁷ Inɗi ki nuɗ, kun oola tuddugun wenda soo ton y'un ti'n dagga ye. Wede yi sooru ki diine geɗ yon ki diine aakede Isa Almasi yon ki diine.

⁸ Wo wede y'isiyo oldfiko geɗ, yon ki Meeda siitandani, kono to Meeda siitandani gette t'isiyo oldfiko t'ume k'eesiyo duniya too, wo yo Ulo Raa y'iido toc miɗ y'a-lette naabo ki Meeda siitandani.

⁹ Wede tuuku yon ulo Raa maɗ, y'a ki lekke adda k'oldfiko ye kono yon ono Raa i lekkiyo adda k'addi. Inkinno yi k'aane yi k'ise oldfiko ye kono yon ulo Raa.

¹⁰ Wede tuuku yi k'isiyo suldi ki diine ye wo yi ki geyyiso zamba ye maɗ, yon geɗ ki Raa ye. T'urzi en kun di'n suune inɗi Raa koo ki Meeda siitandani koo maɗ.

Kun geyyo tuddugun

¹¹ Kun ollo, enno ono don kun illiga t'ume k'eesiyo me: Kine in geyyo tuddin[†].

¹² Wo kine in ise ye aa ki Kayen y'a iide leemadi me, kono yon ki Mohita k'oldfiko. Wo ki moo me yi y'iide leemadi me? Yi y'iide kono yo Kayen geɗ naabadi oldo, wo ere ki leemadi beehiye ki diine[‡].

¹³ Zamba ki nuɗ, kune ulbugun i t'oode ye aame don duniya an un olmide maɗ[§].

[†] **3:11 3.11** Kun wollo adda mattup ki Zanj 13.34. [‡] **3:12 3.12** Kun wollo adda mattup ki Zenez 4.1-8. [§] **3:13 3.13** Kun wollo adda mattup ki Lik 6.22 wo Zanj 15.18-19; 17.14.

14 Kine in suune t'urzi k'unto in t'udfe, anken kine in uune urzi lekkiyo kono in geyyiso zemba. Wede yi ki geyyiso zemba ye man, yon gen yi sooru daayum a urzi k'unto.

15 Wede tuuku y'olmide zemba man, yon aa wede i towwo duwo mirsi, wo kun suune wede i towwo duwo gen i-k'ede lekkiyo ere ki daayum ye.

16 Isa Almasi y'iido y'a ele tuddi, y'a inda kono kine. Inkin man kine ton man in di geyye zemba, in t'ele tuddin kono kane. T'urzi en kine in di zuune geyyiso Raa mummino me.

17 Aame wede i-d'ede maala ki duniya, wo yi wolleyo leemadi yi daayisa y'a-t'appiya edayi yi ki wolleyo sommagi ye man, yon gen i-k'ede geyyiso Raa adda k'addi ye*.

18 Inni ki nun, kine in geyye tuddin ti ono bizin danjal ye, wo de t'urzi naabo pay, gen i-kaza geyyisadin tod'te derec.

19 T'urzi gen in di suuna kine a urzi wede derec ki Raa, wo gen addin a-t'assa a daana Raa me.

20 Wo aame addin i dekkiyo booro eedin man, Raa yon goole yi jire addin wo yi suune suldi pay.

21 Zemba ki nun kune don ki geyyiso, aame addin i ki dekkiyo booro eedin ye man, gen kine in d'ette daana Raa daa k'orgiso.

22 A munda wede tuuku kine in tonde bey yode gen, in di y' t'oone kono kine in aa seedu urziyagi k'oogiradi, wo in isiyi naabo ere yon ulbi i-d'isiyo unse.

* **3:17 3.17** Kun wollo adda mattup ki Deeterenom 15.7-8.

²³ Kun ollo enno urzi k'oogiradi me: Kine in lekko in d'ambo a suma k'Uli Isa Almasi wo in di geyyo tuddin. Gen munda wede yon yi ruute in d'ise.

²⁴ Wede yi seedu urziyagi k'oogoro Raa man, yon gen yi lekkiyo kettiyo ti Raa, wo Raa yi lekkiyo kettiyo ti yode. Wo kine in di suune, Raa yi lekkiyo kettiyo ti kine t'urzi k'Unde Kamilen ere y'in elo gettiyo.

4

Don daggiya duwo

¹ Zemba ki nun kune don ki geyyiso, kane don i rootiyo an'de an d'ede Unde Raa gen, kun ti wollo naabadan do, onaman kun ambe baa ye. An d'ede Unde Raa kotto man kun di'n suuna*, kono don an ti-t'ize tuddan aa nebiyagi, an di tiipe baadan adda duniya.

² Kun ollo, wede i-d'ede Unde Raa kun di y' suune a ono don addiya ti bizi. Inkinno wede tuuku yi rootiyo Isa Almasi y'iido k'adda duniya y'umbe tudde ki wedusu, gen yon ki Raa.

³ Wede tuuku yi ki y' zuune Isa inkinno ye man, yon gen ki Raa ye, unde ere i-d'ede gette t'ettiyo ti Wede k'olmide k'Almasi, wede kun d'illiga y'etto k'adda duniya gen, anken y'iina baa.

⁴ Wo de kune inni ki nun, kune ki Raa, wo kane don an ti-t'ize tuddan aa nebiyagi gen kune kun'ni jiiere, kono Unde ere un d'ede gette tod'te toogo ti jiiere ere i dokkiyo don duniya.

* **4:1 4.1** Kun wollo adda mattup ki Deeterenom 13.2-6.

⁵ Kane geŋ ki duniya. Injino maŋ an orbe aa dŋŋ duniya ge d'orbe, wo dŋŋ duniya an di'n ollige.

⁶ Wo kine'ŋ ki Raa. Wede yi suune Raa y'in di'n olliga, wo wede ki Raa ye y'in ki'n olliga ye. T'urzi geŋ in di suuna Unde ere d'erec ki Raa too te, wo unde ere ki lohito k'ono too te.

Raa yoŋ wede geyyiso

⁷ Zemba ki nuŋ kune dŋŋ ki geyyiso, kine in geyyo tuddiŋ, kono geyyiso gette t'ettiyo ti Raa, wo wede tuuku i-d'ede geyyiso geŋ yoŋ ulo Raa, wo yi suune Raa.

⁸ Wede tuuku i-k'ede geyyiso ye geŋ, yoŋ yi ki suune Raa ye kono Raa yoŋ wede geyyiso.

⁹ Ulí soo d'anjal y'aa di y'igibo ki duniya kono t'urzi yode kine in t'oone lekkiyo ere ki kotto†. Geŋ injino Raa y'in ti gize geyyisadí a kine me.

¹⁰ Kun ollo urzi geyyiso enno: kine ye i giyye Raa ki poone me, wo d'e yode in i giyye ki poone me, y'a t'igibo Ulí y'iido y'a ele tuddí sefeke, y'a inda ki booyiso k'oldikadiŋ.

¹¹ Zemba ki nuŋ kune dŋŋ ki geyyiso, aa kine Raa y'inni giyye baadaŋ injino geŋ, kine toŋ in di geyye tuddiŋ.

¹² Wenda soo toŋ i wulle Raa umbo‡, wo aame kine in geyyiso tuddiŋ maŋ, Raa yi lekkiyo kettiyo ti kine, wo geyyisadí pay y'a-ti d'inge a tukki kine.

† **4:9 4.9** Kun wollo adda mattup ki Zanj 3.16. ‡ **4:12 4.12** Kun wollo adda mattup ki Zanj 1.18.

¹³ Wo Raa y'in elo Undí adda k'addiñ. T'urzi geñ kine in di suune in lekkiyo kettiyo ti Raa, wo yoñ yi lekkiyo kettiyo ti kine.

¹⁴ Meega Raa y'a igibo Ulí ki duniya kono yoñ y'a utta ñuwo pay, geñ kaye ay yi wulle wo ay di rootiyo taayadí.

¹⁵ Aame wede tuuku yi rootiyo bizí y'ede Isa Almasi yoñ Ulo Raa mañ, Raa yi lekkiyo kettiyo ti yode wo yoñ yi lekkiyo kettiyo ti Raa.

¹⁶ Wo kaye ay ti zuune geyyiso ere Raa y'ize a kaye te, wo ay d'umbe.

Raa geñ yoñ wede geyyiso, wo wede yi lekkiyo a urzi geyyiso mañ yoñ geñ yi lekkiyo kettiyo ti Raa, wo Raa yi lekkiyo kettiyo ti yode.

¹⁷ Aame kine addiñ ûune ti geyyiso mañ, a onniyo ere Raa yi ñekka booro toñ kine in k'ede orgiso ye, kono lekkiyadiñ a duniya ette tod'te aa lekkiyo k'Almasi.

¹⁸ Aame in d'ede geyyiso mañ orgiso toñ umbo, wo geyyiso ti t'ôoniyo adda k'adde mañ ti-ti lomme orgiso. Inkino mañ wede i-d'ede orgiso geñ, y'elkiyo yi t'oona dangay. Inkino mañ wede i-d'ede orgiso geñ, addí i ki t'ûune ti geyyiso ye.

¹⁹ Wo kine in geyyiso Raa, in geyyo tuddiñ kono Raa y'inni giyye ki poone.

²⁰ Aame wede y'ede yi giyye Raa wo leemadí yi y'olmife mañ, yoñ geñ wede lohito k'ono. Leemadí wede yi y' woliyo a ñaanadí miñ yi gi di y' geyyiso ye ñe, y'a geyye Raa wede yi ki y' woliyo ye mummino me?

²¹ Wede yi giyye Raa mañ, leemadí toñ y'a yi geyye. Geñño urzi k'oogoro wede Isa Almasi y'in

ruute in d'ise me§.

5

Kine toogo in jiire Meeda siitandani

¹ Wede tuuku y'umbe Isa yonj Almasi Raa yi biire manj, yonj geŋ ulo Raa. Wo wede tuuku yi geyyiso Meega Raa geŋ, inñizí tonj y'anni geyye.

² Aame kine in geyyiso Raa wo in sooru a urzi k'oogiradí manj, t'urzi geŋ in di suune kine in geyyiso inñi Raa.

³ Derec, urzi geyyiso Raa geŋ yonj in di seedfa urziyagi k'oogiradí*. Wo urziyagi k'oogiradí geŋ, kane daaniyadanj i k'oone ye a kine me,

⁴ kono kine pay inñi Raa geŋ in d'ede toogo in jiire duniya, wo in t'ize toogo in di jiire ti zaapu k'addinj a Isa.

⁵ Wee wee i ti jiire duniya te? Yode wede umbe Isa yonj Ulo Raa.

⁶ Yode Isa Almasi y'iido y'a udfde t'urzi k'ahu wo ti puuzo ere k'untadí. Y'iido t'urzi k'ahu d'anjaj ye, y'iido t'ahu wo ti puuzo pây. Wo taaya gette i rootiyo Unde Raa, kono Unde Raa gette tod'te derec.

⁷ Injino manj kane donj afo i rootiyo Isa Ulo Raa me,

⁸ kane Unde Raa, ahu donj ki batem wo puuzo ere k'untadí. Injino manj kane afo geŋ an rootiyo bizaŋ soo.

⁹ Aame duwo an in rootiyo taaya a munda wede an wollejo manj, geŋ kine in d'ambu wo

§ **4:21 4.21** Kun wollo adda mattup ki Matiye 22.36-40; Markus 12.28-31 wo Lik 10.25-28. * **5:3 5.3** Kun wollo adda mattup ki Zanj 14.15.

munfa wede Raa yi rootiyo in d'ambe a ceere. Geŋ Raa yi ruute taaya a tukk'Ulí.

¹⁰ Wede yi ziipa addí a Isa Ulo Raa maŋ, ono geŋ yi'ni zuune adda k'addí, wo wede yi k'umbe a ono Raa enno ye maŋ, geŋ Raa yi ti y'isiyo wede lohito k'ono, kono yi k'umbe ye a ono doŋ Raa yi ruute a urzi k'Ulí me.

¹¹ Geŋ enno ono doŋ Raa yi ruute me: yoŋ y'in ele lekkiyo ere ki daayum, wo lekkiyo gette in t'uune t'urzi k'Ulí.

¹² Wede yi ziipe addí a Ulo Raa geŋ, yoŋ y'uune lekkiyo gette, wo wede yi ki ziipe addí a Ulo Raa ye geŋ, yoŋ lekkiyo gette umbo†.

¹³ N'un raaniya mattup ette kono kun di suune kun uune lekkiyo ere ki daayum, kune doŋ umbe a suma k'Ulo Raa me.

In tondo t'adde soo

¹⁴ Geŋ inŋkino kine in k'ede orgiso ye a daana Raa me. Aame in tonɗiyo munfa wede aa Raa addí i dehu maŋ, y'in di'n ollige.

¹⁵ Aame munfa wede kine in tonɗiyo geŋ in suune Raa yoŋ y'in ollige, geŋ in suune sey aa munfa wede kine in tunde in y'uune.

¹⁶ Aame wenda yi wulle leemadí yi t'iire adda k'oldfiko ere i-ki d'etta unto ye maŋ, yi tondo Raa kono yode wo Raa yi di t'ela lekkiyo a leemadí me. Ni rootiyo ti oldfiko ere i-ki d'etta unto ye kun tonde me. Wo oldfiko ede a-d'ette unto te, wo geŋ ni rootiyo ti oldfiko ere gettiyo ye kun tonde me.

† 5:12 5.12 Kun wollo adda mattup ki Zanj 3.36.

17 Naabo pay ere in isiyo oldo gettinj oldiko, wo oldiko ongo a-ki d'ette unto ye.

18 Kine in suune wede tuuku yonj ulo Raa genj oldiko yi k'ise ye, kono Ulo Raa yi y' boohiyo, Mohita k'oldiko ti-k'ise munda ye.

19 Kine in suune kine ki Raa, wo kane donj duniya pay genj an lekkiyo a bey Mohita k'oldiko.

20 Kine in suune soj Ulo Raa y'iido y'in d'ele eego soodo a elkiso in di suune Raa yi rootiyo ono donj derec. Wo in di lekkiyo kettiyo kanj soo ti Raa yonj yi rootiyo ono donj derec, t'urzi k'Ulí Isa Almasi. Yode wede i rootiyo ono donj derec, yonj Raa batum, y'in d'elo lekkiyo ere ki daayum.

21 Inni ki nunj, kun koono mentikagi, kun daane ye ita lonjayi me!

**Mattup ki Taasuwa ere Aware
Mukulu: Mattup ki Taasuwa ere Aware (New
Testament)**

copyright © 2019 Wycliffe Bible Translators, Inc.

Language: Guerguiko (Mukulu)

Contributor: Wycliffe Bible Translators, Inc.

All rights reserved.

2025-05-14

PDF generated using Haiola and XeLaTeX on 14 May 2025 from source
files dated 14 May 2025

523c1c0a-f8ac-5d2f-aebe-7063b0de6b23